

UPM muncul juara keseluruhan MASUM 2017



Kesemua kontinjen yang mengambil bahagian dalam Karnival MASUM 2017 bergambar ramai pada majlis penutup karnival berkenaan.

Bangi: Universiti Putra Malaysia (UPM) menutup tirai Karnival Sukan Majlis Sukan Universiti Malaysia (MASUM) 2017 dengan pencapaian cemerlang, sekali gus dinobatkan juara keseluruhan pada karnival kali ini.

UPM berjaya memungut 55 pingat emas, perak (27) dan gangsa (26).

Universiti Teknologi MARA (UiTM) pula berada di tempat kedua dengan 27 emas, perak (32) dan gangsa (22), manakala Universiti Sains Malaysia (USM) di tangga ketiga dengan 18 emas, perak (23), dan gangsa (19).

Kejohanan Karnival Sukan MASUM 2017 ini berjaya dianjur-kan oleh

pihak MASUM hasil daripada komitmen penyertaan 20 universiti awam (UA) di negara ini.

Buat persiapan rapi

Ketua Kontinjen UPM, Dr Hanafiah Ayub, berkata kejayaan mengungguli Karnival MASUM itu adalah hasil kerja keras semua atlet dan pegawai pasukan yang membuat persiapan rapi serta latihan diadakan secara konsisten dan sistematis.

“Sebelum ini, sasaran kami adalah 45 pingat emas untuk menjadi johan. Alhamdulillah kerana kita berjaya melepas sasaran dengan 55 emas dan saya berbangga dengan pencapaian atlet

UPM,” katanya.

Kontinjen UPM menghantar penyertaan seramai 270 atlet membabitkan 16 acara sukan yang dipertandingkan.

Pungutan pingat UPM banyak terhasil daripada beberapa sukan iaitu olahraga, renang, tae kwan do, karate, memanah dan boling padang sekali gus menyumbang kepada juara keseluruhan MASUM 2017.

Sebanyak 16 acara sukan dipertandingkan pada edisi kali ini yang berlangsung di sekitar Universiti Kebangsaan Malaysia (UKM), Bangi yang menawarkan 169 pingat emas, 169 perak dan 204 gangsa.